

---

COMUNICÂT STAMPE

**MOZION CUINTRI IL DECLASSAMENT DAL FURLAN**

**Zanon: Al "Festival des Peuples Minoritaires" di Aoste  
o domandarin la solidarietât di dutis lis comunitâts linguistichis**

Udin, ai 4 di Setembar 2012 – La lenghe furlane e je stade invidade tant che ospite di onôr – dutun cun Irlanda dal Sud e Luisiane - ae cuarthe edizion dal "Festival des Peuples Minoritaires", la rassegne inmaneade dal assessorât ae Culture de Regjon valdostane dai 7 ai 9 di Setembar.

Nassût tant che ocasion di incuintri e scambi jenfri lis comunitâts di minorance par promovi e prudelâ la diviersitât e la ricjece dal patrimoni linguistic e culturâl, il festival al somee la platee plui adate par che il Friûl Vignesie Julie al berli fuart cuintri il declassament de lenghe furlane a dialet. Une situazion creade dal decret di riduzion de spese fat bon dal Guvier che, in concret e in particolâr, al à colpît il mont de scuele ridusint classis e puescj di vore e che, in gjenerâl, al à metût in dubi il status di une lenghe declarade tâl propit cuntune leç di Stât (la 482/99).

Une vore ricognossint ai "amîs valdostans" par l'invît ae impuartante rassegne il president de ARLeF-Agenzie regionâl pe lenghe furlane, Lorenzo Zanon, nol pues nasuindi la braure par jessi rapresentant di une minorance che al festival e sarà ricevude cun ducj i onôrs: "O sin contents che in cierts cercins o sin considerâts di serie 'A' e no vignin declassâts", al comente cun ironie.

Propit par chest, la ocasion dal incuintri indulà che dongje a concerti, cine, sfiladis cun animazions a son proviodûts ancje moments di dibatit - il prin al è organizât dal Collège d'Etudes fédéralistes a Valsavarenche e il secont a Aoste sul teme des minorancis te ete di Internet - e vignarà doprade par fâ buine une mozion di solidarietât di bande des altris comunitâts a pro da furlan.

L'obietîf al è chel di rivâ a evitâ il ricors ae Cort Costituzionâl (che la aministrazion regionâl e à bielzà fat savê di jessi pronte a inviâ) che dome un pas indaûr dal Guvier al pues sconzurâ.

"Mi somee une vore impuartant - al zonte il president de ARLeF -il teme sielzût, ven a stâi di cemût la Rêt e pues judâ lis minorancis. Secont mê a cheste region e podarès coventâ par tornâ a une centralitât dentri de Europe. Fin a îr l'altri o vin vivût dome i condizionaments negatîfs, ven a stâi i confins, lis vueris, i tancj interes economics che a son passâts sore il nestri cjâf. Cumò e sarès ore di capî la potenzialitât grandonone che je rapresentade dal fat di jessi un laboratori linguistic vivent, che al è dibant e al è strument formidabil par il svilup culturâl ma ancje socio economic".

Il pinsîr di Zanon al va propit ae cuistion dal declassament dal furlan. "A chei siôrs che ogni dî a fevelin a sproposit de inutilitât di investî bêçs tes lenghis di minorance si à di fâ presint che la prime consequence dal declassament dal furlan a son propit cuistions economichis e piardite di puescj di vore".

Tutelâ lis lenghis al conven. Chest il mes che si scoltarà fuart a Aoste.